

समां - 12:25 hrs.

<><><><><><>

LG-Drug Menace

लैफ्टिनेंट गवर्नर मनोज सिन्हा होरें जम्मू -कश्मीर च नशे दी कबैतु गी दना बर्दाश्त नेंई करने दी नीति अपनाने दे निर्देश दिते न। ओह कल लोकभवन जम्मू च डिप्टी कमीशनरें-SSPएं ते सिविल ते पुलस प्रशासन दे सीनियर ऐहलकारें दी इक उच्ची सतह दी बैठक दी प्रधानता करा'रदे हे। एल.जी होरें प्रदेश गी नशीले पदार्थे यानि ड्रग्स शा मुक्त बनाने लेई बहु-उद्देश्यी नीति अपनांदे होई नशीले पदार्थे दी तस्करी आले नैटवर्क गी तबाह करने-लोकें गी इस भेठा जागरुक बनाने लेई बड्डे स्तर पर अभियान चलाने ते नशे दी लत दे शकार लोकें दे इलाज सनें उनें'गी मार्ग-दर्शन ते आबादकारी दी सुविधा उपलब्ध करोआने दी जरुरतै पर जोर पाया। श्री सिन्हा होरें भलेआं हेठली सतह उप्पर खूफिया जानकारीयां कठेरने ते नशा-तस्करें खलाफ संगठित ते सख्त कार्रवाई दे बी निर्देश दिते न। मुख सचिव अटल डुल्लु- जम्मू-कश्मीर पुलसा दे अध्यक्ष DGP नलिन प्रभात ते होर दुए आला अफसरें बी बैठका च हिस्सा लैता।

<><><><><><>

Narcotics Seizure

नशे दे गैर -कनूनी कारोबार खलाफ बड्डी कामयाबी दे तैहत कनून नाफज़ करने आली एजेंसिएं जम्मू-कश्मीर च पिच्छले 5एं बरे दे दरान 68 ज्हार 62 किलोग्राम नशीले पदार्थ

ज़ब्त कीते न। इन्नी भारी मात्रा च होई दी एह बरामदगी खिते च नशा तस्कर नैटवर्क दे पैमानें ते इन्दी नकेल कस्सने लेई सरबंधत एजेंसिएं पास्सेआ चलाए जा'रदे अभियानें पर बी लोs पांदी ऐ। जम्मू-कश्मीर च नशीले पदार्थ दी लत दे सर्वेक्षण ते ज़बती दे सरबंधें च नेशनल कांफ्रेंस दे सांसद चौधरी मोहम्मद रमज़ान हुंदे आसेआ पुच्छे गेदे सोआला दा परता दिंदे होई समाजी न्याs ते सशक्तिकरण मंत्रालय आसेआ एह जानकारी सांझी कीती गेई ऐ।

<><><><><><>

LG-SKUAST -J

लैफ्टिनेंट गवर्नर मनोज सिन्हा होरें कल इक उच्ची सतह दी बैठक लाइयै प्रदेश च सबूतें पर आधारित नीति बनाने ते राई-बाई दे खेतर च टिकाऊ बदलावे लेई स्कास्ट जम्मू ते International Food Policy Research Institute- IFPRI बश्कार सामरिक साथ-सहयोग पर चर्चा कीती। एल.जी सिन्हा होरें IFPRI दे कन्नै प्रस्तावित सैहयोग दा सुआगत कीता ते आखेआ जे उंदी वैश्विक म्हारथ दे कन्नै खिते च संस्थागत समर्थ गी तगड़ा बनाने च बड़ी मदाद हासल होग। बैठक दरान IFPRI दे सैहयोग कन्नै स्कास्ट जम्मू च खाद्य नीति ते डेटा विश्लेषण आला इक उत्कृश्टता केन्द्र खडेरने बारे चर्चा कीती गेई।

<><><><><><>

CM- Regularization

जम्मू-कश्मीर च ध्याडीदारें गी पक्का करने दी सरकार दी वचनबद्धता गी फही दोहरांदे करदे होई मुखमंत्री उमर अब्दुल्ला होरें विधानसभा गी जानकारी दिती जे मजूदा माली बरे दे दरान मरहलेवार ढंगै कन्नै एह प्रक्रिया शुरु कीती जाहग। विधायक मुहम्मद युसुफ तारीगामी हुंदे आसेया ध्याडीदारें गी पक्का करने दी मंग आले प्राईवेट मैम्बर बिल पर परता दिंदे होई उमर होरें आखेआ जे बिल च जेहड़ा बी मसला पुट्टेआ गेआ ऐ ओह बिल्कुल बी गलत नैई ऐ।

मुखमंत्री होरें आखेआ जे ओह ध्याडीदारें गी पक्का करने सरबंधी प्रस्तावित विधेयक दे पिच्छे दी मंशा दा बरोध नैई करदे न पर उ'नें इसी पेश कीते जाने दे समें गी लेइयै अपने ऐतराज व्यक्त कीते न।

<><><><><><>

CM-Doc Pvt. Practice

मुखमंत्री उमर अब्दुल्ला होरें आखेआ ऐ जे सरकारी डाक्टरें दी प्राइवेट प्रैक्टिस पर रोक लाने लेई असरदार हीले कीते जा'रदे न। जम्मू-कश्मीर विधानसभा च प्राइवेट मैम्बरें दे बिल पर प्रतिक्रिया दिंदे होई मुखमंत्री होरें आखेआ जे बिल च जेहड़ी बी मंग पुट्टी गेदी ऐ ओह बिल्कुल बी गलत नैई ऐ। उ'नें आखेआ जे एह माड़ा चलन पूरे जम्मू-कश्मीर च फैली गेदा ऐ। उमर होरें आखेआ जे पैहलकी सरकारें आसेआ बी इस माड़े चलन पर रोक

लाने आस्तै समें-समें पर हुक्म रसाल कीते गेदे न- पर इंदी अमलावरी कदें बी स्हेई ढंगै नै नैई होई सकी ऐ।

<><><><><><>

NHPC Projects

National Hydroelectric Power Cooperation (NHPC) दी मिलकियत आहली परियोजनाएं गी केन्द्र शासित प्रदेश सरकार गी मुंतकिल करने दी मंग करने आहला इक मता जरूरी प्रस्ताव अज्ज विधानसभा च पेश कीता जा'रदा ऐ। आकाशवाणी दे जम्मू संवाददाता दी रिपोर्ट मुजब NC दे विधायक सजाद शाहीन हुंदे आसेआ पेश कीते गेदे इस प्रस्ताव गी अज्जै लेई सदन दे कम्में दी सूची च शामिल कीता गेआ ऐ। एह मतदान दे राएं चुने गेदे 7 प्रस्तावें च शामिल ऐ। अज्ज कारवाई दरान इस प्रस्ताव उप्पर चर्चा होने दी मेद ऐ।

<><><><><><>

SEC Pyt Electoral Rolls

जम्मू-कश्मीर दे राज्य दे चुनांस आयुक्त शांतमनु होरें कल पंचैत मतदाता सूची 2026 च जारी संशोधन दी समीक्षा लेई इक बैठक सददी। परतियै निरीक्षण करने आहली एह प्रक्रिया 27 मार्च 2026 गी मतदाता सूची दे मसौदे जारी करने कन्नै शुरु कीती गई ही-जेहदे च पूरे केन्द्र शासित प्रदेश च मतदाताएं दे नमें नामांकन बारे नांस हटाने जां स्थानांतरण कराने बारे दावें ते ऐतराज लेई आमंत्रित कीता गेआ हा। SEC नै Field Staff आसेआ घरें-घरें च Outreach उप्पर जोर दिता तांजे एह यकीनी बनाया जाई सकै जे इक

अप्रैल 2026 दी Cutt Off तरीक तक्कर 18एं बरे दे सारें योग्य मतदाताएं गी पंचैत मतदाता सूची च दाखल कीता जाई सकै। दावे ते ऐतराज दर्ज करने दी अखीरी तरीक 29 अप्रैल 2026 तय कीती गई ऐ।

<><><><><><>

Satish –Sports

खेड्ड मंत्री सतीश शर्मा होरें कल युवा सेवाएं ते खेड्ड मैहकमें दे कम्मकाज दी समीक्षा कीती- जेहदे च मते जरूरी प्रशासनिक ते मनुकखी-वसीलें सरबंधी मुद्दें उप्पर ध्यान दिता गेआ। इस समीक्षा दा मकसद पूरे जम्मू-कश्मीर च खेड्डें ते युवाएं दी भागीदारी दे पूरे-पराते विकास लेई इक रणनीतिक रोड मैप त्यार करना हा। मंत्री होरें मुख चनौतियें बारे चर्चा कीती ते खेड्डें दे बुनियादी ढांचे गी बधाने- युवाएं दी भागीदारी गी बढ़ावा देने ते मैहकमे दे संचालन गी सुचारु बनाने लेई आखेआ। उ'नें युवा प्रतिभागियें गी खिते च खेड्डें गी प्रोत्साहित करने लेई नमें तरीकें दी लोड उप्पर जोर दिता। उ'नें लम्मी अवधि थमां बकाया पेदे मनुकखी वसीलें सरबंधी मुद्दें दी बी समीक्षा कीती।

<><><><><><>